

Premier Evelyn Wever-Croes:

Señor Heintje Ras ta un baluarte di bario di Brazil cu hopi amor pa comparti historia di Aruba

DIADOMINGO pueblo a topa cultura den e gran celebracion di e di 4 BarioFest y e Parada di Cultura cu a tuma lugar na Brazil. Bariofest ta un proyecto di Special Projects cu ta resorta directamente bou di Ministerio di Asunto Social.

Prome cu cada BarioFest, Special Projects ta duna oportunidad na pueblo pa nomina baluarte, persona cu a resalta den comunidad. Y durante Bariofest, e personanan aki ta wordo reconoci.



Prome Minister Evelyn Wever-Croes diadomingo ultimo tabatin e honor den nomber di Minister Glenbert Croes, di a entrega certificadonan di reconocimiento na 5 baluarte di Brazil: Angelo Richardson, Giandrick van den Berg, Luis Inario Maduro, Heintje Ras y Vicente Ras. Cada nominado a resalta den diferente area. Y cada un, durante e siman aki, a haya un dia pa pueblo por conoce e motibo pa cua nan a wordo nomina como baluartenan.

Awe ta toca pa pueblo conoce un tiki di señor Heintje Ras.

Henry Franklin Ras, mihor conoci como Heintje ta un tata di dos yiu, kende alabes ta fungi como mama y tata logrando un famia hopi uni. Actualmente e tin 22 aña sirbiendo e pueblo di Aruba na Cuerpo di Bombero Aruba.

Pero loke mas ta resalta den sr. Heintje ta su amor como coleccionista. Riba Facebook, sr. Heintje tin su paginanen conoci como Museo di Antigüedad Nos



Bieunan y 'If you grew up in Aruba, You Remember' na unda cu señor Heintje ta comparti historia, potretnan historico y potretnan di artefactonan di su propio museo.

E museo aki, sr. Heintje tin ya pa dos aña caba na su cas na Rooi Master. E museo ta conta cu miles di artefactonan antiguo cu ta conta e historia di nos antepasadonan. Pa aña ta yega mas di 4000 bishitante na su cas cu el a converti den un museo cu ta haya bishita di tanto hende local como hende internacional.

Sr. Heintje tin hopi placer den loke e ta haci pa comunidad y su deseo principal ta pa pueblo siña conoce loke ta di nos mes.

E ta organisa caminatanan den naturalesa na unda cu alabes e ta splica historia di Aruba. E ta un guia tambe pa mucha y adulto den e minanan di fosfaat y den e tunnel di awa.

Cultura pa sr. Heintje ta hopi importante y varios bi-aha el a declara su amor pa Aruba den e festival di 'Un Canto na nos Himno y Bandera'.

Tur loke cu sr. Heintje ta haci ta di curason y boluntariamente. P'e motibo aki tambe, bario di Brazil a nomina sr. Heintje como un baluarte di Brazil.

Den nomber di Gobierno y Minister Glenbert Croes, Prome Minister a felicita y gradici sr. Heintje pa su amor y dedicacion pa comparti su conocimiento cu Aruba henter.